

DRE FENESTER KYTTRYN IN KERNOW

gans Gray Lightfoot

trailys dhe Gernowek gans

Nicholas Williams

Hag ev ow meras i'n myrour wàr dhelergh, ma drîvyor an büss ow predery

Na výdh den vëth ow meras in mes a'n fenester hedhyw i'n jëdh,

Ma's mammow yn unnyk ow tesky an kensa geryow dh'aga flehes.

Yma an bobel goth ow kestalkya pymp mildir warn ugans in eur;

Y re wrug an viaj-ma mar venowgh na wra

Tra výth ma's droglamm kerry pò margh dienkys

Tedna aga fedn dhyworth omassayans levow scavel an gow.

Nyns usy an remnant, fastys dh'aga clapgùthow, ow merkya an vuys ow passya,

Cloudys ow tremena, semlant an mor, bownderyow keyn pow pò porthow pyctùresk.

Yma an drîvyor ow perthy coth a dhedhyow y floholeth,

Pàn wre va ha'y vamm kemeres an kyttryn rag mos dhe'n shoppys.

Awos pôlyô Mammyk res vedha dhodhans gortos awoles.

Ev a vydna ponya an dremenna in bàn ha crambla in esedhva ryb an fenester,

Hy a wre lenwel an spâss rypho, hag ev a omglôwa yn saw.

Der an fenester Cynemascôp ev a dheskys y kensa geryow ...

Esso, Shell, arwedhyow munys an ragcortys o aswonys dhodho

Dhyworth an argemynnow kenys wàr an bellwolok dhu ha gwynn.

Ev a'n jeva govenek pùpprys a'n tòkynor coynt esa darbar clôves dhodho,

A vynna trailya an dornla wàr jyn brâs metol an tokynnow

Ha trewa in mes an nader a baper in unn whyrny yn teg.

Y fedha an tòkyn sensys in mes dhe'n flogh splann y dhewlagas

**May halla va bos tennys in kerdh dhyworts orth an prÿjweydh dewetha;
Y fedha an devos gwaries arta hag arta ha sordya folwharth an maw
lowenek;**

**Saw res yw dhe daclow a'n par-na dewedha pùpprys hag ev a
remembars**

Tùll in y vyctory, pàn wrella dalhena an pray in y dhorn bian.

Dell esa an wolok dhyworth an fenester ow chaunja dhe vuys glassa,

Y vabm a wre y inia dhe whelas bestas ow por;

Assa wre va cria gans joy ow qweles buhas, mergh ha deves!

Dedhyow yêyn ha glëb, an fenestry a servya avell astell galhen

May whre an glûth gasa dhodho tenna kerry tan ha fâcys

Poken screfa y hanow gans rach i'n main mogloos.

Pàn wrella ev deseha, y fedha trist na veu tyller gesys rag screfa

**Hag ev a omgontentya owth attendya an glawlednow ow fysky dhe
legh an fenester.**

Pàn vedha ev cotha, ev a vydna mos in bàn ha gîky.

Ow meras orth bÿs dywel fenestry kensa leur an treven

In govenek a weles neb tra (ny wodhya ev bythqweth pandra).

Gwell o gordhuwher pàn vedha chambours gwrës pyskvaow

**Golowhës wàr jy, ow tysqwedhes splander goodhvêwnans i'n nos
tewl.**

**In kensa osow y adolescens ha moy adhewedhes avell den yonk
Ev a garsa fenester ryb tenewen an fordh may halla dhe well gweles**

(Te a via pelha in kerdh wàr an tu aral) an mowysy yonk teg

Hag y ow kerdhes i'ga dyllas hâv an cauns ahës.

An maw yonk methek a omglôwa mar glos dhodhans dell vedha nefra.

**Warlergh gwil dhe'n bùss gwandra dre govyon y yowynkneth
Yma an drîvyor ow dystaga an honenlewyor, ow lent'he hag ow
stoppya**

Rag den, istynys y vregh, usy ow ponya tro ha'n savla.

**Yma an termyn ow tyckya ha'n den ow fysla der y sagh rag tōkyn
seythen,**

**Y settya wàr an jyn; yma pederow whës ow sevel wàr y dâl
Hag ow codha hag ow sewya nansow y vrehel stanch.**

**Ma gwibya y dhewlagas ow tyskevra an dennva owth hùmbrank y
jorna solabrës;**

**Sprallys der y fiendasow, ym va ow lesca tremenva an bùss in bàn,
Owth esedha yn idhyl, owth hedhes y dhorn rag an unn dra a weres.**

**Yma va ow scubya der an dowlennyk *CalmerU* wàr y glapgûth
Heb gwil vry a ‘Gover Meneth’, ‘Glaw in Lowarth ’Na ‘Howl wàr an Mor’
Erna dheu va bys onen a vydn y servya yn tâ...**

**“Vesyon a’n cloudys ow tremena, semlant an mor, bownderyow keyn
pow**

Ha porthow pyctùresk”.

Yma va owth hanaja...hag ev moy hebask.

Y dhôwys yw henwys...

“Dre Fenester Kyttryn in Kernow.”